

## DOMINGU VII TEMPU KOMÚN – TINAN C

### Tema

Liturjia domingu ne'e nian ezije husi ita domin totál, domin laho limite, maski ba funu-baluk mós. Nia konvida ita atu tau sees lójika violénsia nian no troka ho lójika domin nian.

*Leitura dahuluk* apresenta mai ita ezemplu konkretu mane ida ho fuan boot (David) ne'ebé, maski iha possibilidade atu elimina ninia inimigu, nia hili perdaun.

*Evanjellu* reforsa proposta ida-ne'e. Nia ezije Jezús nia maktuir sira atu iha fuan ida nafatin disponivel atu perdua, atu hili, atu lolo liman, independentemente husi sé mak iha oin. La'ós de'it hadomi membru grupu sosiál rasik, rasa rasik, povu rasik, partidu, igreja ka klube futeból rasik: ne'e mak domin laho diskriminasaun sira, ne'ebé lori ita atu haree iha ema ida-idak – maski inimigu – ita-nia maun-alin.

*Leitura daruak* kontinua katekeze ne'ebé hahú domingu ruma liubá kona-ba moris-hi'as. Ita bele liga nia ho tema sentrál Maromak nia Liafuan domingu ne'e nian – domin ba funu-baluk sira – hodi dehan katak iha lójika domin nian mak ita prepara moris nakonu Maromak rezerva mai ita; no katak domin moris ho radikalidade no laho limitasaun sira mak anúnsiu ida mundu foun ne'ebé hein ita liutiha rai ida-ne'e.

### LEITURA I – 1 Sam 26, 2.7-9.12-13.22-23

Leitura dahuluk, hasai husi Primeiru Livru Samuel nian, halo parte konjuntu ida tradisaun sira ne'ebé deskreve istória oinsá David sae ba tronu (1 Sam 16 – 2 Sam 6). Iha testu ida-ne'e apresenta epizódiu emblemátiku ida molok David to'o iha podér. Maski Maromak hili nia, tanba nia hetan persegisaun husi liurai Saul ne'ebé laran-moras, David tenke halai atu salva nia moris, enkuantu hein atu Maromak nia planu bele kumpri. Loron ida, David iha possibilidade atu oho Saul no remata persegisaun; maibé nia lakohi foti liman hasoru ida-ne'ebé “Na'i kose mina” bá. Kuadru ne'e situa ita iha tinan 1015 mK.

Livru Samuel la'ós livru istória nian, maibé livru teolojia nian; nune'e, imposivel hateten ho modu rigorozu katak nia livru istóriu, maibé katekeze. Autór deutoronomista sira, responsavel ba redasaun no edisaun obra istórika ne'ebé hahú husi Josué to'o 2 Reis, preokupa liuliu – kona-ba epizódiu liturjia apresenta ohin – ho finalidade teolójika ida: apresenta David nu'udar liurai ideál, aten-barani, maibé ho fuan boot, protótipu ema ne'ebé la hadook an husi Maromak nia dalan sira, ne'ebé hodi ninia laran-di'ak no mizerikórdia dada ba nia no ba nia Povu Jahwéh nia bensan sira.

### MENSAJEN

Testu tau iha oin forma rua atu hasoru ema ne'ebé halo agresan no violénsia mai ita. Husi sorin ida, hatán no selu to'o o eliminasaun fízika agresór nian... Ida-ne'e mak atitude agressiva hanesan Abisai.

Husi sorin seluk, atitude lakohi tama iha lójika agresan nian no deside atu perdua, hodi evita atu espirál violénsia nian atinje nivel inkontrolavel. Ne'e mak David nia atitude.

Buat ne'ebé teólogo deuteronomista sira sujere ba fiar-na'in sira mak David nia atitude aprezena nu'udar protótipu ema di'ak nian, ne'ebé bele vinga agresór, maibé nia la halo. David halo ida-ne'e tinan rihun ida molok Kristu. Katekeze Israel nian hanorin katak ema nia moris – maski ita-nia agresór – pertense ba Maromak no Maromak de'it mak iha dirietu ba nia.

## **LEITURA II – 1 Cor 15, 45-49**

Testu ne'ebé propoin nu'udar leitura daruak integra iha pasajen ida luan liu (kf. 1 Cor 15, 35-53), iha-ne'ebé Paulo reflète kona-ba “modu” moris-hi'as nian. Oinsá mate sira moris hi'as? Fiar judaika tempu ne'ebá nian hanoin mundu moris-hi'as nian nu'udar kontinuasaun mundu prezente nian; iha momentu moris-hi'as, tuir fiar judaika, ema hotu sei rekupera isin ne'ebé husik hela iha mundu ne'e. Espiritualista sira Corinto nian la aseita fasilmente representasaun ida-ne'e (hanoin bá katak ema gregu sira haree isin nu'udar materiál, sensuál, ‘*carnal*’, ne'ebé labele iha asesu ba mundu ideál, espirituál).

Saida mak Paulo hanoin kona-ba ne'e hotu? Maski mistériu ida, Paulo la sees husi kestaun ida-ne'e no aprezena reflesaun sira ne'ebé bele klarifika ninia interlokutór sira nia problema, katak, sarani sira husi Corinto.

### *MENSAJEN*

Paulo nia afirmasaun bázika mak mate sira sei sai objetu transformasaun kle'an liu atu to'o ba estadu moris hi'as nian, isin iha rai no isin ne'ebé moris hi'as ona, hotu-hotu isin maibé diferente ba malu.

Paulo uza figura Adão nian atu esplika ida-ne'e. Husi sorin ida, iha Adão dahuluk, foti husi rai, ema rai nian no mortál, modelu humanidade enkuantu la'o iha mundu ne'e. Husi sorin seluk, iha Adão daruak (Kristu moris-hi'as) ne'ebé, hodi Espíritu nia asaun, sai “isin espirituál”. Modelu ne'ebé ema fiar-na'in, sarani sira tenke kompara nia an mak Adão daruak, Jezús ne'ebé moris hi'as: hodi inkorpora an iha Kristu nia batizmu, fiar-na'in sira tanesan an ho Kristu moris hi'as no sei sai, hanesan Nia “isin espirituál” ida”. Saida mak “isin espirituál” ne'e? Paulo la esplika; maibé iha tradisaun bíblika, “espíritu” la'ós sinónimu ho imaterialidade ka isin-laek, maibé forsa, vitalidade, podér, kreatividade nian.

Nune'e, ko'alia kona-ba ita-nia moris-hi'as katak ko'alia kona-ba estadu iha-ne'ebé ita sei sai “isin espirituál” ida, tuir ilas Kristu moris-hi'as nian. Iha “isin espirituál” ida-ne'e prezente ema tomaak, ho kualidade foun – kualidade Ema Foun nian.

## **EVANJELLU – Lc 6, 27-38**

Ita kontinua orizonte “diskursu iha rai-tetuk” ne'ebé hahú lee iha domingu kotuk. “Rahundi'ak sira” (kf. Lc 6, 20-26) propoin ba Jezús nia maktuir sira dinámika foun, diferente husi dinámika mundu nian; iha sekuénsia, Jezús ezije ba ninia emar sira transformasaun sentimentu no atitude rasik, atu domin okupa nafatin fatin dahuluk.

### *MENSAJEN*

Ezijénsia atu hadomi no perdua mak novidade radikál ne'ebé Jezús inventa. Testamentu Tuan koñese ona ezijénsia atu hadomi maluk sira (kf. Lv 19, 18); maski nune'e, ezijénsia ne'e iha limitasaun sira. Inimigu sira Israel nia la'ós maluk, nune'e domin no perdaun (kf. 1 Sam 24,

26), ne'e ba maluk rai rasik, ema sira ne'ebé fiar-na'in Antigu Testamentu nian iha ligasaun étnika, sosiál, familiár, relijiozu. Ódiu ba inimigu, ba sira ne'ebé la halo parte povu no rasa hanesan mak buat ruma naturál ba Testamentu Tuan (kf. Sal 35).

Jezús hakat liu doutrina Testamentu Tuan nian. Ba Nia, presiza hadomi maluk sira; no maluk sira, mak ema seluk, laho exesaun, maski seluk ne'e inimigu ida, maski nia ko'alia aat ita, fó malisan mai ita, sira-ne'ebé istória ka husi bei-ala sira nia tempu iha ódiu ne'ebé halo haketak ho sira (kf. Lc 10, 25-37). Ezemplu konkretu ne'ebé Jezús fó kona-ba ne'e (kf. Lc 6, 29-30) sujere katak la to'o evita hatán ba ofensa sira; presiza hakat liu no inventa dinámika domin nian ne'ebé dezarma violénsia, agresividade, ódiu. Nia la husu ita, atu iha atitute kobarde, pasiva ka kolaborante iha injustisa no opresaun nia oin; buat ne'ebé Nia husu mak iha kapasidade ba jestu konkretu sira ne'ebé nakfilak espirál violénsia no ódiu nian: husu atu la hatán ho modu hanesan; maibé dispostu nafatin atu simu ema seluk, maski nia hakanek ka ofende ita; lolo nafatin liman ba maluk, hodi la ko'a dalan sira diálogu no komprensaun nian. Domin mak forma ida mesak atu dezarma ódiu no violénsia. Nune'e de'it mak fiar-na'in sira banati tuir Maromak nia laran-di'ak, domin no ternura.

Afirmasaun Lc 6, 31 ida-ne'e ema baibain hanaran "regra osan-mean" karidade sarani nian: "buat ne'ebé ó hakarak ema halo ba ó, ó mós halo ba sira". Nia indika katak domin la limita de'it ba esklui aat, maibé implika kompromisu sériu no objetivu atu halo di'ak ba maluk. Nune'e, ita tenke rejeita imkomprensaun "merkantilista" hotu regra nian: buat ne'ebé ita buka mak ema seluk nia di'ak no la bazeia ba resiprosidade de'it. Versíkulu sira tuir mai (kf. Lc 6, 32-35) asentua perspetiva ida-ne'e no garante katak ema ne'ebé halo di'ak ho forma gratuita, laho kálkulu no hodi la hein selu ka atu ema mós halo ba nia, bele hanaran sira "Maromak nia oan".